

Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxxx 2012-imeersoq (Sorsuttoqarneranut sorsuttoqarnissaanullu aarlerinartoqarneranut pilersaarusiornissamut piginnaatitaaffiup tiguneqarnissaa)
(Ineqarnermut, Attaveqarnermut Angallannermullu Naalakkersuisoq)

Saqqummiussissut Siullermeerneqarnera

Matumuuna Naalakkersuisut sinnerlugit Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allanngortinneqarnera pillugu Inatsisartut inatsisaattut siunnersuut saqqummiuppara.

Suleqatigiissitap Kalaallit Nunaanni upalungaarsimanermut inatsit pillugu nassuiaammi inassuteqaatai tunngavigalugit inatsisissatut siunnersuut suliarineqarpoq, suleqatigiissitallu inassuteqaatai kingulliit atuuttussanngortinneqassapput, taamaalillunilu suliaasaqarfinnut akisussaasuunermut tunngavisoq Kalaallit Nunaanni, suliaasaqarfinni Namminersorlutik Oqartussanit tiguneqarsimasuni tamakkiisumik atuuttussanngortinneqarsinnaalissaaq.

Inatsisissatut siunnersuummi sorsuttoqarnerani sorsuttoqarnissaanullu aarlerinartoqarnerani pilersaarusiornissamut piginnaatitaaffiup nalinginnaasumik tiguneqarnissaa piareersarneqarpoq.

Ajornartoormi sorsuttoqarneraniluunniit suliassat iluarsineqarnissaat siunertaralugu pilersaarusiaq oqartussaasut ulluinnarni suliassanik iluarsinissaannut, kiisalu ajutoortoqarnerani ajunaarnersuaqarneranilu, ulluinnarni isumalluutit naammakkunnaartillugit suliassat pineqartut isumagineqaannarnissaannut pilersaarusanut qanittumik attuumassuteqarpoq.

Suliaasaqarfinni Namminersorlutik Oqartussanit tiguneqarsimasuni pilersaarusiorneq ataatsimut isigalugu assigiiginnartussaavoq, pisoq ajutoormik, ajunaarnersuarmik sorsunnermilluunniit pissuteqarsimagaluarpat. Ulluinnarni aqutsinermi upalungaarsimanermi eqqarsaatigisassat pisariaqartut isumagineqartussaapput, taamaalilluni upalungaarsimanermi iliuusissat sapinngisamik amerlanerpaat inuiaqatigiit eqqarsaatigalugit naammassineqarsinnaassallutik. Taamaaliornikkut upalungaarsimanermi ulluinnarni suliassaniit ajutoornernut annertunerusunut ajunaarnersuarnullu, tassungalu ilanngullugu sorsuttoqarneranut aqqiisoqarsinnaalissaaq. Taamaattumik iliuusissat, ulluinnarni isumalluutit naammakkunnaartillugit aallartinneqartussatut pilersaarutigineqartut ulluinnarni upalungaarsimaneq aallaavigalugu ineriartorteqinneqassapput, iliuusissanilu suliassanik iluarsisarnernit nalinginnaasut atortullu pioreersut tunngavigineqassapput. Tamatuma nassatarisaanik sorsuttoqannginneranut sorsuttoqarneranullu avitsisarneq upalungaarsimanermik pilersaarusiornermut tunngavigineqartarunnaassaaq.

Sorsuttoqarneranut sorsuttoqarnissaanullu aarlerinartoqarneranut pilersaarusiornissamut piginnaatitaaffiup tiguneqarnissaa, Namminersorneq pillugu inatsimmi § 4 naapertorlugu Naalakkersuisut aamma Naalagaaffiup akunnerminni isumaqatigiissutigisussaavaat. Sorsuttoqarneranut sorsuttoqalernissaanullu aarlerinartoqarneranut pilersaarusiornissamut piginnaatitaaffiup tiguneqarnissaa pillugu Naalagaaffimmut isumaqatigiissusiornissaq eqqarsaatigalugu, inatsit manna tamanna pillugu Naalakkersuisut nalunaarusiornerisigut atuutsinneqalissasoq siunnersuutigineqarpoq.

Illersornissamut Ministereqarfiup Statsministereqarfik suleqatigalugu isumaqatigiissusiassaq suliaraa, taannalu malillugu suliassaqarfinni sakkutooqarnermut tunngassuteqanngitsuni upalungaarsimanermi sorsuttoqarneranut sorsuttoqarnissaanullu aarlerinartoqarneranut pilersaarusiornissamut piginnaatitaaffik Namminersorlutik Oqartussanit tiguneqassaaq. Inatsisartut inatsisissaattut siunnersuutip matuma akuerineqarneranut peqatigitillugu, suliassaqarfinni, Namminersorlutik Oqartussanit tiguneqarsimasuni sorsuttoqarneranut sorsuttoqarnissaanullu aarlerinartoqarneranut pilersaarusiornissap tiguneqarnissaa pillugu Naalakkersuisut Naalagaaffimmut isumaqatigiissusiornissaat Inatsisartunit akuerineqassaaq.

Taamatut oqaaseqarlunga Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut manna Inatsisartuni kajumittumik suliassanngorlugu tunniuppara. Siunnersuut aappassanneernejannginnermini Inatsisartut Attaveqarnermut Ineqarnermullu Ataatsimiititaliaannit suliarineqassasoq siunnersuutigineqarpoq.